

**Atuarfinni sorlerni meeqqanut inuusuttunullu ajornartorsiutitik pillugit saaffigisinnaasaminnik amigaateqarnersut pillugit, amigaatillu taakku qanoq iliuseqarfigineqarsinnaanersut pillugit pilersaaruteqartoqarnersooq Naalakkersuisut UPA 2017-imut nalunaarusiornissaannik suliniuteqaqqullugit Inatsisartut aalajangiiffigisassaattut siunnersuut.**

(Inatsisartunut ilaasortaqa Anthon Frederiksen, Partii Naleraq)

**Akissuteqaat**

(Ilinniartitaanermut, Kulturimut, Ilisimatusarnermut Ilageeqarnermullu Naalakkersuisooq)

**Aappassaaneerreqarnera**

Ataatsimiititaliap suliarinnissimanera Naalakkersuisut qujassutigaa. Oqaluuserisap pingaaruteqartorujussuuneranik ataatsimiititaliap isummenera Naalakkersuisut isumaqatigaat. Naalakkersuisulli ataatsimiititaliatulli isumaqarput, soorlu siullermeerinninnermi Naalakkersuisunit taaneqartoq, aalajangiiffigisassatut siunnersuut inatsisinut suliasaqarfimmi atuuttunut naapertuutinnigilaq, taamaammallu ingerlateqqittariaqarani.

Meeqqat inuusuttullu pisariaqartitaannik naammassinnittumik tamakkiisumillu eqqarsaatersorluni nunamut tamarmut atuuttumik iliuusissanik pilersaarusiortoqarsinnaaneranik ataatsimiititaliap apeqqutaanut tunngatillugu Naalakkersuisut imaattumik ilisimatitsissuteqarsinnaapput.

Naalakkersuisoqatigiit anguniagassaminnik isumaqatigiissutaannut ilaavoq meeqqanut inuusuttunullu tunngatillugu isumaginninnermi nunamut tamarmut atuuttumik iliuusissanik pilersaarusiortoqassasoq. Inatsisartut 2017-imi upernaakkut ataatsimiinnissaannut Naalakkersuisut inatsisissamik siunnersuuteqassamaarput meeqqanik ikiorsiisarneq pillugu, inatsisissarlu taanna qitiujumaarpoq tamakkiisumik eqqarsaateqarluni meeqqat inuusuttullu ajunngitsumik ineriartornissaminnut pisariaqartitaannik naammassinnittumik iliuseqarniarnissamut.

Naalakkersuisoqarfiit assigiinngitsut suleqatigiissutigisaannik suliniutinik arlalinnik maanna aallartitsisoqareersimavoq ilinniartitaanermi, isumaginninnermi peqqinnissaqarfimmilu. Taakkunani suleqatigiiaat tamakkiisumik eqqarsarluni aaqqiissuteqartarnissamik tunaartaqarput.

Taamatuttaaq siunnersuisarfiit sivilisinerusumik ammasarnissaat aammalu meeqqat inuusuttullu telefonikkut saaffiginniffissaqarnissaat kissaatigineqartoq Naalakkersuisut maluginiarpaat, pisariaqartitsinerlu tamanna iliuseqarfiginiarneqarpoq.

Isumaliutissiissut tunngavigalugu taamatut oqaaseqarlutik Naalakkersuisut siunnersuutip itigartinneqarnissaa inassutigaa.